



Regd.No.19134/88

<http://www.kbc.org.in>

NAI/220/99

No-G-4/Regd.Magazine/KBCThuso/MNP-81

KBC THUSO

So465

Kum 55 Ihinna

Bulte/February 2018



Mar2018 Events

MISSION WEEK '01-04

KBC SUNDAY - 11

PALM SUNDAY - 25

GOOD FRIDAY - 30

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11

2018

**65th Kuki Baptist Convention
General Assembly**
*a Deligate keet in lunglut tah a
Assembly Report avet pet*



www.kbc.org.in



kbcindia@rediffmail.com
mail@kbc.org.in



CONTENTS

THUMAKAI HO

1. Editorial/Machalna Tohgon	1
2. NALAMPI HOU LE NATHIL BOL HOU KISEM PHATUVIN/ <i>Pastor Haoneo Haokip</i>	4
3. Chonsete holdoh Lhandampu/ <i>Rev. Henjalen Dounge</i>	7
4. Khonung a Thillhungding/ <i>Rev. Onthang Haokip</i>	9
5. NA LAMPI HOU KI SEMPHAT UVIN/ <i>Mr. Ginpu Haokip</i>	13
6. Mission Column	15
7. Men Column	20
8. Women Column	21
9. Youth Column	23
10. Literature Column	24
11. Christian Education Column	27
12. Report/Hetsah	28-31

EDITORIAL BOARD

Chairman	: Rev. Dr. HawIngam Haokip, President KBC
Editor	: Dr. M. Thongkhosei Haokip, General Secretary
Joint Editor	: Rev. Henjalen Dounge
Contributing Editors	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
Cir. Manager	: Ms. Lhingjanem Haokip
Design & Layout	: Hemkholen Haokip

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 9612817768 Contact thei.
Circulation to kisai lam Mobile No. 9862633173 bol ding.



“Machalna tohgon.”

Editorial

Houbung mite jouse iPakaiyu Jesu Christa min ngai pen minin salaam kahin peuve. Tunaicha 65 channa KBC Assembly (25-28, Kangpokpi) a chun aget lhinna KBC General Secretary a dinga Pathen leh mipi deisahna kachan toh kilhonin February nisim 1 a kipat in charge kana lapan in ahi. General Secretary chu by post a KBC Thuso Editor ahitoh kilhonna hiche article/editorial hi keiya dinga amasa pen ahi. Hijeh chun houbung mithengte jouse nabon chauvin kumthah vangboh changchekh dingin kahin deisah lheh e. Kum thupia ineiyu chungchona lhatin thupi inei kit un, tulha thupi chu ahileh ‘Machalna Tohguon’ kiti ahiye. Machaalna kitihi mang (vision), mission chuleh gel poimo (core values) hoa ahungkipanne kiti leh seikhel hiponte. Hijeh chun machaalnahung kipat theina dingin eiho KBC Mang (Vision), Tohdinga ikiguonu Mission chuleh Ngai Poimo (Core Values) member jousen ineikhomu chu kahin tahlang nome. KBC Mang (Vision)

- KBC member khat chehhi Christa a pilhinna neiya kipehlutna aneyu: niseh a Pathen toh phat mang khom jinga, hopsom leh adang kitahtaha apehjinga kamang mat uve.
- Insung jouse Pathen luchang hina noiya ain-chen uva, nu le pa'n chate khohsahna leh cha te'n nu le pa ngailutna le jana neiya hinkho amanu kamang mat uve.
- Houbung sunga khantum neilouva member jouse achan dingdolu changa, kingailutah leh khat le khat kitil khoutoa iumu kamangmat uve.
- Pathen thu kihilna leh kilhangsap jing jalla gam-sunga officer le haosa /lhaang lamkai (politician) ho guhchat-lahchat (corruption) beiya na atoh jal uva khantouna ahunglhun kamangmat uve.
- Meithai chagaho, tibukim louho, chuleh ngai-chat na neiho panpina dia fund nengtah a aum; Bible jilla vaikonho lhasam loule sum le pai jeh a boi louva lungluttah a ajilu ka mang mat uve.
- Khangdonghon khamna thei jatjat ho - drug, ju, tahsa kijoh, etc. hoa kona akikangseuva, dam thei tah a thungai leh thepna chihna lama mi dang hotoh kibanga aumu kamang mat uve.
- Gamsung leh khosunga hiche houbung member ho panlah jalla lekha hetlouna, veisetna chuleh vaichatna suhmanga aum kamang mat uve.
- Gamsunga tahsan kibahpi leh inam chanpiho toh Pathen lenggam machaalna dinga tohkhomna thei lampi jousea itohkhomu kamang mat uve.
- Society sunga hiche houbung member ho panlah na jalla nam lamkai holeh nam sepaiho kipum khat tah a chamihat gaal asat khom jal uva alung-tup u amolsou kamang mat uve.
- I society sunga kitha kimat niseh a pung jingho houbung mi holeh lamkaiho panlah najalla ahung

kem'a chuleh abei kamang mat uve.

- *KBC tup le doi banga polam leh sunga tahsan kibahpiho toh mission natohna lam, themjilna lam chule damtheina lama kihethem tah a na itoh khomu kamangmat uve.*
- *Pakai lamlen semtohsa ahia, alampi semjanga aum; damkom chengse dipchama aumu leh mol jouse le lhaang jouse suhnema aumu; lamkon jouse semjanga auma, aphonho suhnaama aum u; chuleh mi jousen Pathen huhhingna amu u kamang mat uve.*
- *Hichehi ikinenau leh itahsannau ahin, amitakip hiche lolhinna dia pang dingin kakitep uve. Pathen kithopi jalla jona mudingin kakinem uve.*

Mission

- *Vannoi mite jesu christa seijuiya sem ding*

Akigel Poimoho (Core Values)

- *Christa kipana thupha phuon jal (evangelism/ proclaiming the good news of Christ)*
 - *Christa ngailut na chu khotona natoa pohdoh ding (express the love of Christ through ministries of compassion)*
 - *Pathen chu lungluttah a houva loupisah ding (glorifying God through passionate worship)*
 - *Lamkai feltahho kichuhna (developing strong leaders)*
 - *Midang toh kijahmatto na semhoi na (expanding connections through technology and communication)*
- Lungluttah a simho jouse chungu Pathen vangboh chang cheh tauhen.*

NALAMPI HOU LE NATHIL BOL HOU KISEM PHATUVIN

(Jeremiah 7:3)



*Pr. Haoneo Haokip
Secretary,
Literature & Publication
Kuki Baptist Convention*

SERMON

“Nalampi hou le nathil bol hou kitem phatuvin,” kiti thu hi mi-hem (adeh a tulai Christian te) hinkhoa dinga kihilna dinga phatah thu ahi. Hiche thu hi, Jerusalem houin keltkot phunga dinga houin a Pakai chibai boh dinga (Pathen houva) hung jouse jah a phong-jal dinga Pakai Pathenin angansena dungjuia themgao Jeremiah in lhanglang (Judah) leng-gam a Israel chate jah a anasei ahi. Hijeh chun, Jeremiah themgao lekhabu bung 7na hi, “Houin a Thu Kisei’ (The Temple Sermon), tin jong akihen ahi. Ipijeh a themgao Jeremiah chun (Pakaiyin angansena dungjuia) hitobang thu hi anasei hintem?

Judah leng-gam / Jerusalem mite chun, houin chu Pakai chenna mun ahin, hijeh a chu Pakaiyin houin kisuhchim ding chu aphal louhel ding, koima

asuh chim sah louding, hiche houin jeh a chu amaho jong achonset nauva kon a gotna chang lou dingin akinemuvin ahi (cf. 5:12-13). Hichu kinepna

dih lou tah ahi. Judah leng-gam mite chun Pathen thu le them-gao ho thusei tahsan a Pakai Pathen thua chon sangin adei deiyin achon jenguvin, Jerusalem houin sunga chengpa Pakai Pathen sangin houin joh chu agelsang jouvin, atahsan jouvin ahi. A-Pathen hou'u chu polam mitvet le alhem a abolu bou ahin, asung-giluva kitahna bei ahin, akinep nau amaho dinga jouva kilhep lhahna bou ahi. Hitobanga Pakai Pathen ahounau chu Pakaiyin asan theilou ahi (cf. 6:20). Hiche jeh a hi themgao Jeremiah chun, "Hiche kilhep lhahna thusei hoa hin kinep dauvin," tia (Jer. 7:4) chutobang kilhep lhahna thu hoa chu kingai louva, abit theina diu le achen theina diuva alampi houle athil bol hou akisem phat joh diuva aseipeh ahi.

Judah leng-gam a Israel chate lah a chun alhasam te (meithai, chaga genthei ho) suh gimna (cf. Deut. 1:29; 16:11; 24:19; Ps. 94:6); mona bei thisan sona (cf. Deut. 19:10-1; 21:1-9); pathen dang (semthu doi lim) houna (cf. Exod. 20:3-5) kiti ho anaboluvn, lim semthu pathen (doilim) hounan kilhaina anasemun, hitichun Pakai doumah mah aboluvn, Pakai mitmun achoseuvin, houin jong chu gucha michom houin aso tauvin ahi. Ahin hiche houin umjeh a chu amaho chu achonset nauva kon a gotna changlouva

kihuh-hinguva, gamsunga lung monga cheng din akinemun ahi. Ahin, gamsunga lungmonga achen theina diu chu houin umjeh chu hilouva, achon/lam-lah u, alampi hou le athil bol hou akisem phatuva, akisuh dih uva Pakai mit mua achondih uva, Pakai lam asan tengule bou gamsunga chu lung monga cheng thei diu ahi.

Israel chate lamchom chom a achonsetnau chung chon a, "Keima tailou nangman Pathen dang nanei lou ding ahi," ti (Exod. 20:3) toh kikal a lim semthu pathen (doilim) ho ahou'u chu Pakai Pathen dinga thohmah umpen khat chu ahi. Ahin, them akichan nalaiyuvin, Pakai Pathen umpina chang dingin akinem nalaiyuvin ahi. Hichu them kichanna dih lou tah le kinepna dih loutah ahi. Israel chate chun alampi hou le athilbol hou kisémpat joh dinga themgao Jeremiah thusei chu don e hol e anati pouvin (ngai nahsah in ananei pouvin) athusei jeh in anaho/anadoudal uvin, ana-engboluvn ahi. Ahin, Jeremiah themgao thusei chu ahung guilhung tan, Jerusalem chu amelma teuva konin suh chimin ahug umtan, gal hingin kaimangin aumun, kumsot tah mi gam a genthei tah in khopemin anaumuvn ahi.

Christa a sopi deitah teho! eihon jong tunia hi idei dei, inop

nop iboluva, idei dei, inop nop a ichonuva, them ikichan tei tei nah lai yuva, Pathen umpina chang dinga ikinep nep nah lai diu ham? Hiche chu thil dih lou tah ahi. Pathen mitmua chonsetna ho kisi a, ilampi hou le ithil bol hou ikisem phatuva, Pathen lam isanuva, Pathen deilam a ichonuva ihinu angaiyin ahi. Achuti loule khonung tengle thon louva ichonna dungjui cheh uva ichunguva Pathenin thu ahin tan teiding ahi.

Adeh in tulai Kuki te dinmun hi ivet leh chenmun/gemun/toumun detna gam le go ngaicha nam mite ihiuve, kitile seikhel seival ahibehseh louding tahsan

aume. Ichondan le ilamlhah dan, ihil bol hou Pathen lung lhaina himong nam ti phatah a kikhoh phat u angaiye. Pathen mitmua ichondan, ilam lhah/ilampi hou le ithil bol hou adih masang sea Pathen umpina, puihoina le phat thei bohna ichan thei loudiu ahi. Pathen mitmua ichondan hou, ilampi hou le ithilbol hou ikisem phatuva, ikisuh dihuva, Pathen phat thei boh chang dia lom ihi tengule bou



Pathen umpina, puihoina le phat thei boh ichanuva, chutengle Pathenin lungmong lhamonga chenna thei ding gam eisuh det peh diu ahi. Lhagao lam hinkhoa seidingin, ilampi hou le ithibol hou ikisem phatuva ikisuh dih tengule bou huhingna le kipaman ichan diu ahi. Tunia ichondanu le ihindan chu kitah louna hinkho ham, jon thanhoina hinkho ham, neh nop/don nopna (jukham sava) hibkho ham, joulhepna hinkho

ham, thisan sona le tol thana hinkho ham, engset thang thipna hinkho ham, Pathen jalouna le taitomna hinkho ham, hiche ho tilouva Pathen deilam to kikal a chonna dang dang ho ham? Hichehoa kon a chu ikisuh dih

uva ikisem phat u angaiyin ahi.

Hijeh chun, chung a kiseiho lunga ngaito pumin malai Israel chate dinmun tobang ito lona diuvinn amichang cheh, insung cheh, khosung vengsung, houbung sung le nam pumpi in Pathen mitmua ichondan, ilam lhah/ilampi hou le ithilbol hou kisem phat a kisu dih tei dingin taona pumin hatah in pan lacheh ute.

CHONSETE HOLDOH LHANDAMPU

Luke 19:1-10

Rev. Henjalen Dounjel
Secy. Mission.

Sermon

Jesu le aseijuite Jerusalem jondia Jericho khopi lailung ajotpa lajun Zacchaius atiu mihaosa kaidong pipui khat theiba chung a atou amuve. Hichun Jesun hung kum lhadin thu apen ahi. Zacchaius kipah tah in ahung kum lhaloijin Jesu chutoh ainn lam jon din ahung khom taovin ahi. Kaidong pipui inna lhung dinga Jesu ache jeng chu mipi hochun ana oimouvin michonse inna lhung din ache taget ne atiuvin ahi. Hia chun Aman Pathen thupha deium tah ahung lona kicheh taha kisei chetna thucheng chu anaphong doh e. "Amangsa chu holdoha huhhing dinga mihem chapa hung ahi" ati. Lk 19:10.

Hiche bible changa hin thucheng giltah thum akimue. amangsa, holdoh chule huhhing.

I. Amangsa: A m a n g s a kiti thucheng hi atamjon kichat, lungdon, lungkham, chule aphachom lou to seimat ahi jingechapang khat amange, pasal khat akihol moe etc kiti hohi lungdon lungjin to kisai thucheng jeng danin aumjinge.

Luke 15 ahin Jesun thulem jat thum anasei je. Kelngoi kiman sah, sum kiman sah chule chapa vahmangpa. Hiche thulem kiman na jouse a hin amangsa thujeng akiseijjin mihemte hi amangthai ihinao ikihetdoh nadingu Jesu lungdei khat ahi.

1. Kelngoi mang achanga kihuh doh jou lou. Hiche kelngoi mang hin avetsah chu mihem khat chu aman thah na akon ama le ama akihuh doh thei poi. Hijeh a chu

mihem khat chun tonsot hin na anei thei na dia Pathen lam kat a ahin jing angai je, Pathen panglou vin mihem khat in aman thahlam jong akihet jipon onthol nading le kihin so nadia Pathen abel jing angaije ti vet sah na ahi.

2. Sum kiman sah. S a n a dangka chule thilman tamtah itihou hi iman dana kon le ideisahna sandana kon aman tamna um bou ahi. Tuikhanglen thutah noijsana dangka tampi um khu manlou va aumlaisea amantamna jong umlou ahi. Thil chu anei aumteng lebou aman tamna chu hung kilang doh ji ahi. Mihem jong hi Pathen in ama a ding mong a asem ahin aneipa Pathen a ihi louleh

panna bei aman umlou tonsot damun a umding bep kihi ahi.

3.Chapa vahmang pa: Chapa neojo pa chun anei legou chanding jouse akilah doh soh in nopsah nan anamang chai jin ahi.Asum lepai keo hilou vin amatahsa jengjong panna beijin amang chatan amang thai chu anahi tai.Hinlah amahi amale ama kibol ahin,mangthai ta jongle avella kinung lea apa ngailut na changa huhdoh a umkit mimang thai chu ahi.

II.Holdoh: Mihem koi-machan Pathen aholpoi,Pathen in joh mihem te ahol doh ahi. Eden honsunga jong chu Pathen in Adam chu anahol doh tho ahi. Thulhun Lui ivet leh Pathen hin mihemte holdoh teidia ahin gon na natoh imudinguh ahi.

Aphat alhin phat in Pathen chu Mihem in ahung peng tai.Pathen lhagaotheng chu mang thai ding ho holdoh din ahung kisol in ahi.Christa a hinna neijouse hiche lhagao huh hingnading natoh ding hi imopoh nao ahicheh e.

III.Huhdoh. Sochatna (salvation) kiti hi thucheng thum kigom khoma kitem thucheng ahi. Hichechu themchana, kisuhthengna chule kihuhingna thucheng akon sohdothucheng ahi.

Vetsanan-O J Peterson kiti pa

hin ahinkho thusim hiti hin anasei je.Kanule kapa chu houinn kaimi anahi pon judon salop anahi hone.Kain koma Southern Baptist Church khat um chun khatvei cha jong houinn kaidin eitem kha pouvin ahi.Sunday School kaidin eina kitem khapon,Vacation Bible School ahilouleh Pathen thua kikhop na dang danga pang din jong khatvei cha eina kitem khapon ahi.

Chapang cha kahi a pat in Ju kahin don in khamna thei loule ai kahin netan ahi.Teen ager kahung hihin khamna thei loule aineh na a kakibol den tan ahi.California khopia khamna thei ho hi manbai cheh le holbai cheh ahijeh in California a kagavah lut tan ahi.Hiche khopia chun Arthur Blessitt kahin kimupi tan ahi.Aman Jesu Christa chung chang eisei peh tan ahileh chubanga chonse pa chu Jesun eingai dam sa ahi kahin kihet tan ahi.Tonsot damun a kon huh doh kahi tai,June motchon a kon huh doh kahi tai,Loule aii neh a kon huh doh kahi tai,Panna bei hinkho a kon huh doh kahi tai,Keima huh hingna chang kahi tai.

Hitabang huh hingna natoh hi mihem te a kon hilou vin,Pa Pathen a kon ahijoi,Eihon ama iholu ahipon ama johin eiho eihung hol dohu ahi.

Pathen thangvah in umjing taken.

KHONUNG'A THIL LHUNGDIING HO MUTHEINA (*vision*)

By; Rev Onthang Haoakip
Secy., Education board, KBC

Sermon

Mihem hinkho a Kho-mutheina(Eye-Sight)ineiju hi mantam ahi. Mit khomu kisuh lou hon sum le pai tamtah sengin akijenjuvin, mutheina dingin mitbeh mangloi jong aki-um'in ahi. Kho mutheilou mitcho ho khu agentheilheh uve. Kho phatecha a muthei hi Pathen thangvah umtah ahi. Mit a imuthei banga Lunggil ngaitona a Pathen lungdei ho muthei ding hi kultah ahi.

Vision ipi tina ham?

'Vision' kiti thucheng hi polam chuleh sunglam mutheina tin Dictionary leh lekhabu tampi ah akimutheie. Pathen in mihemte thilpeh manlutah eipeh hou lah a Khomuna(eye-sight) hi khat ahi. Mangthem a Pathen loupina mudohna dinga Pathen in eipeh u hi-jongleh mudan/vetdan dihlou jeh in chonsetna akilhatheije. Mitmu kicheh lou, ahilou leh kho mulou ho chu 'Mitcho' tin jong akihei. Mitmu kichen tah a thil imuna ban'ah Gao thu hettheina'VISION' itipen uhi Prov. 29:18 in aseijin, "Gaothu kiseina louvah mipi amang thah jin, (English Bible a chun"Where there is no Prophetic vision, people perished" tin akisun e). Hichea eihetsah u chu "Lungmit'a khonu-nga hunglhungding Gaova thilmu kicheh tah neithehi hi Pathen thilpeh ahin, mi-hem hinkho a dia thil kiphamo tah ahi".

Pastor Taiwo Kyode(Japaness Pastor) in hitin aseije, 'thilmu (sight) kiti hi 'mit (eye)' natoh ahin khonung ding thilho mutheina(Vision)

hi lunggel natoh ahi' ati. Hiche thucheng Vision hin 'Mit a im-ubangin khonung thil hung lhung dingho eimusah un, hetchet theilou leh ahitheilou ding thil ho jong Pathen tahsanna thahat in kichehtah leh hitheilom tah in eimusahtheije', ati.

Bible a Vision kilahna ho:-

Thuchih khat chun, 'Vision neilou mi chu khonung neilou ahin, khonung neilou mi chu ahinlaija athisa ahi', atin ahi. Vision nei mi chun tohdoh aneiteiding ahi. Imopohna dol a Vision kicheh tah nei angaijin ahi. Tulaija al-impol hon Vision atiuva akilom-lou thil mudan a akisei jihou tobang hilouvin, Bible thusim le Houbung khang kipat a pat tukhang chan a Vision neiho phabep gahveohite;

1. Pathenin in Daniel chu Vision apei. Pathen thilpeh ho chandan hi akibangpon, phat tin a umjing jong ahipoi. Daniel leh aloite chu athemjilnau mun a jong nikhat leh Jerusalem lam nga'n thumvei chan ataojiuve ti imu've. Hijeh chun Pathen in Daniel le aloite achoisangin, khonung thilsoh ding ho amusah in ahi. Lenglen le gilou tah Nebuchadnessar jengin jong Pathen achoi-an in, jabolna ahin-petai ti imu'uve (Daniel 2:20-23).

2. Houbung khang kipat tillai thusim ivet leh Solchah te ho chu anngol in ataojiuvin, Pathen in thisoh dingho hetsahna ahinpejiuve ti akimui. Vetsah na'n, Peter, Joppa a aumpet a agilkel pet chun Cornelius in mi ahinsol a ahung kousah ding chun Gao aneiin, Van akihon a Bom lentah a Sa namkim hung kikhailha amu'n ahi. (Acts 10:10-15). Solchahte chun Chonsetna leh khangitlouna ho hi ana doudal un, thutahle hangsan tah in Pathen thu ana hettah sah un ahi. Pathen tahsan in ijakai aboljiuvin ahi. Thil kidang abol u, chule ana ho adamsah u chu mihon amutengu leh Pathen avahchoiji-juvin ahi. Pathen tahsanna detah leh kicheh tah nei hi 'Vision' dihpén, Pathen manchah leh deisah ahi ti iseidoh nom pen u chu ahi. Tunin jong I-Houbung sunguva Solchah te tahsan leh natoh thilbol bangva itoh diu hi ngaichat ahijing nalaije (Acts 15:1-22).

3. 18th Century lampeh a Hudson Taylor (China gam'a Missionary), William Carey (India gam'a), David Livingstone (Africa gam'a) chuleh adang Missionary tampin lhagao mangthai ding ho huhdohna ding lunggil ngaitona aneiju toh kilhon'a hinkho phal'a avai kondoh nau jeh in lhagao muchi anatulut'uvín, ga lentah asodan u thusim ho imuvín ahi.

Tukhanga Houbung lamkaite:-

Tukhang Houbung lamkai ho mopohna chu, Chung'a ihinseiju Gao thu hi Charismatic loijin avop u tobang hilouvin phat nunung ahitai, Pathen gam anaitai, Satan in Christian ho lamchom chom a alheplah nom ahijeh a atahsan ah Houbung mite ho iti puihoi ding ham tithu a Vision kicheh tah Inelouva khoh ahitai. Tukhanga mihemte atamjo lungput leh natoh hohi alhangpi'n vannoi chena lampi ijuinau akilangjin ahi. Houbung sunga kilamkai didan, kivaihom didan, kiloikhom dan ho Pathen (lekhabu) Bible a imu hou-sanga leiset chihna a kivaihomna Dan le Mol ho thupijo'a ilah-nom nao jong umda jilou ahi. Houbung lam-kai kilhendan ho jong MLA Election kiboldan toh akilona chan jong aumda-jipoi. Houbung lamkaija kilhengdoh hon Pathen in ipi tong dinga eipansah nom ham ti geldoh jilou lamkai umda jilou ahi. Houbung lamkai konkhat in Half Tithes kapeh lou leh ko'n i-eilotheding ham ti lunggel neiloi jong umdan in thu akija jin ahi.. Houbung khantouna ding igelnao vah Pathen douna thil tampi iboldoh joh diu kichat aum e.

Tulai hin i-Houbungsung dinmunhou ivet leh khonung ding

thil ngaitona leh mutheina Vision hi akiphasam lhehtai. Khonung/Gao thu seijong akingain-omtapoi. Kivaipohna Dan le mol ho jong Bible a ho juisangin eima deija suhlamdang theina akideijo gamtan ahi. Organization a chena lhongpi ineihou jong ngaisahna alhasamtan ahi. Ipijeh hintem? Pathen ginna leh ngailutna ilhasam jeh himaithei ahi. Phaten ngaito phau-hite. Atahsan ho kiloikhomna(vetsahna'n Kuki Baptist Convention) noija umho chengsen ikhantou theinadiu vision ineicheh diu kultah ahi. Kiloikhomna sung'ah kipum khat angaije. Kijato angaie. Kingailut kikhohsah to angaije. Kitah angaije. Hichu thildang a hilou, Pathen lenggam kehlet-bena ding bou ahi.

Thuchaina:- Tahsan chaten 'Vision' ineidiu aphantna chu, Pathen thilgon ho hetdohna ahin, chule asubulhit a ipanding u ahi. Houbung sunga thil lhungho adihlam dol'a juithem theiding hi Pathen lhagaova thil het theina neiten bou aboldoh theidiu ahi. Houbung sung hi Pathen lenggam ahin, Pathen lenggam a chu Pathen miten Pathen lungdeiho kichen tah a het a, Alenggam khantou sahtheina Vision neiding hi Pathen lunggot ahi tia iseinaova Pathen in phatthei eiboh taohen.

"NA LAMPI HOU LE NA THILBOL HOU KI SEMPHAT UVIN."

(Jeremiah 7:3)

*Gl. Ginpu Haokip M.th Student
(ATC)- 4th Feb. 2018*

Sermon

Tukum KBC in hiche Bible chang kum thupi a iman u hi kipa um kasan ahi. Ajeh chu mimal kihi hen, houbung lelvel hihen Gambih le Convention level hijong le koima perfect ki um lou ahin semphat ding area kinei sohkei ahi e. Hijeh chun lamkai hon hiche Bible chang kum thupi a ahin lhen jeh uvin ama ho jallin Pathen ka thang vah e.

?? A text, ti chu Jeremiah bung sagi sung hi isim ma ahi leh Israel te Pathen na konna ava mang uva Pathen dang dang ahou jeh ule, chonna dang dang ho achon uva Mose thupeh banga a chon lou jeh uva Pathen in Jeremaiah Themgao komma Israel te warning ahin bol ahi. Aki sem phat uva a chonna hou a khel uva Pathen kom ahin nai na diu va thupeh ahin abol lou uleh Pathen in achung uva lhung ding Punishment jong gonsa akoi dan jong aki mun ahi.

?? Hiche text hi eiho context to jong kitoh kasa lneh in ahi. Adeh in Manipur thinglhang le phaicham ma Christa nungjui a kigel Christian te ding in. I lampi hou semphat dinga Pathen in eidei sah hou chu chi thum in ana veu hite.

1. Pathen Hou (worship): Pathen in Israel te warning apeh lo na pen chu a Pathen hou u aki suhdih diu chu ahi pen in ahi. Hibang chun eiho jong tunin i Pathen houdan u a thah iki vetphat kit u ngai kasa mama jeng in ahi. Pathen hou hi mitam pin igel khel taovin ahi. Christianity hi mitampin tradition in aki nei tan, Sunday ni le Houin kai a, hopsom peh a maicham sem ma, Antheng neh a, kum 15 ahung lhin le se ta le pha ta le twi ilut uvin ahi. Hiche ho hi Pathen houna dih tah tah chu hinam? Hicheng a lung oi Christian aki tam tan ahi. Ngailutna a Pathen ihou u hinam? Lhagao le thutah a Pathen i hou u hinam? Nahin kho Jesu no. 1 hinam? Na insunga Jesu sanga thil thupi jo nakoi em? A um a ahi le iki semphat diu Pakai in adei in ahi. Mihem khat in Pathen dih tah a ahin nei a lhagao le thutah a Pathen ahin hou le abol jouse chu ngailutna in abol jin ahi,

hichun Pathen aki pasah ji ahi. Dan(law) le tradition a Pathen hou ihiu le vang Pathen lung oi jou pon te tin kagel in ahi.

2. Society (Jallhang hinkho) : Kuki te hi Christian ihi masang uva pat a Bible jui te ana hui ahi tai. Khankho a dim, kija na a dim le kingai lu to a insah inlhang an me kithah to te ina hui ahi. Ahin tuhin Christian ihi phat uvin, a Bible thu hita louvin Bible eihin poh peh u Sap kang te chonna joh in ija lhang hinkho u alo dim tan vangset a um lhez e. Kija na a lhasam tan, khankho a um ta pon ahi. Numei in pasal control ta, Nule pan chate thu angai khang hita, Holy Marriage khat aki bol le mi tam pi doubt anei ta, Gollhang khat in tulai nungah ho vang koima virgin um ta ponte atin ahi. Hitobang chu ija lhang hinkho u ahi leh sopi te i Pathen u a lunglhei na dem? Khaiye, Christian dih tah le Kuki dihtah lampi a ki nung le tao hite. Khantou na iti hou hi sapsetna lampi jong ana hithei ji ahi e. Houin sung sanga Nitin ichon nao hin koi ihiu aphondoh joh ahi.

3. Kivai homna (Governance): Bible a Pathen in angeh khoh pen tah khat chu thudih a kivai hom hi ahi. Houbung hihen, society hihen, Goverment lam hijong le thudih a kivai hom ding hi Pathen in a ngeh khoh pen tah chu ahi. Kuki te ding in hiche thudih a kivai homna hi mipin aki ngaichat na asot lhez tan ahi. Housa le khochaga kah a, MLA ho le agam mipi kah a, Govt le mipi ho kah a thudih um nam? Eiho context a seidin vang a um poi. Mipi a chandia lom chang jou ta lou, ahao ho hao cheh2 jeng avai cha ho vai cheh2 jeng. Bible in anei kipeh be ding anei lou ama a konna kilah pehding ati khu nei le gou thudol a kisei ahi poi, ahin eihon chan le vou le nei le gou thudol a apply ibol gam taovin ahi. Tulai in Houbung kiloi khomna ho Convention, association level ho ivet jong le Pathen khonung sang in politics aha kimu jo ji tan vangset um tah ahi jin ahi. Hiejeh a hi Houbung thusim ivet jong le Houbung kibung khenna hi Pathen dei hi louva mihem hon adei dei uva thil abol teng ule soh ji ahi. HOUBUNG KIVAI HOMNA hihen, Khosung kivai homna hihen, Lhangsung kivai homna hijong le abonna Pathen in adei chu Vaicha genthei khohsah na, thudih a thu kitan na, nehguh chah guh um louna, deitum sah tum um lou va Pathen mai ve a kivai homna chu ahi. Hiche ho chu aum lou laisea chu kivai hom na chu dih lou ahi. Houin ah Pathen Pathen tijong leu hen, kivai hom na adih tokah a Pathen eiho lah a kikum lou ding ahi.

PATHEN IN A SIM JOUSE PHATTHEI BOH TA HEN

Mission Column

MISSION WEEK 2018

Kumseh a ina chepi jing bangun Tukum Mission Week hi 1-4th March sunghe ahin, hiche nikho sunga hi kaikhomna jouse a KBC Mission natoh dan isei uva Dept. lamkaihon jong igel khoh diuvin ikitem uve. Hiche haptasunga kaikhomna jouse a neitokhom houbung Mission board khutna ihin pehlutcheh uva houbung in hichu Mission office a ahung thahlut ding ahi. Chule hiche Mission Sunday nia hi hopdoh din houbung jouse a Mission Envelope jong ahung kithot in lamkaihon ihin gelkhoh uva houbung mijouse pan lahnathei ja ihinboipi va chuleh agangtheipena office lama ihin thahlut diuvin jong ikitem uve.

Centre Church jousea Church Pastor main speaker hiding, chule gambih Pastor hojong hiche hapta sungle Sunday nia hi ikikhop napen penu houbung achu Mission natoh thu iseidiuvin ikitem uve. Hiche haptasunga hi Convention Mission natoh dan akicheh nathei pena mipi hetthei dia inaseiphong dio vin temna ahung kinei je.

Houbung phabep a Sunday speaker ahungkisol in, gambih phabepa Evangelist ho haptasung kiman nading nikho ahung kiseme. Ahungkisol hohi kipahtahle hoisel a ina kimankhom pi diuvin ikitem uve. Houbung atamjoavang ahungkisol joutapon, anahethem u hitin aphaatheipen in MISSION WEEK hi houbung lamkaihon eima houbung cheha ana gel khoh u hite.

Tukum Mission Sunday Theme "Keima kaumnai, neisolin" Isaiah 6:8

Programme Highlight:

Conductor:	Mission Board Chairman
Phat patna tao:	Women Chairperson
Labung:	Baptist Youth Department
Thupi seiding:	Church Pastor/Head Deacon /Guest Speaker
Mipi Taokhom Achaiding:	Speaker

Taona a kop dingho:

1. Missionary/Evangelist ho (list enclosed)
2. Mission Secretary Rev Henjalen DOUNGEL le M/E Asst. Evan. Jamkhohao Haokip

3. Mission field ho-

a) Meitei Mission field b) Nepali Mission field c) Arunachal Mission field d) Nepal Mission field

e) Myanmar Mission field f) Hindi Baptist Church Moreh g) Elijah Taona Moul Main Sanctuary (New Chapel hall) construction Gothol. h) Tripura Mission field i) Tabitha Girls Hostel Arunachal.

Pakai lengama natohkhompui

(Rev Henjalen Doungel)

Mission Secretary

Kuki Baptist Convention (I)

Mission Office vilnaneihoh

Achesa 22nd January ni chun ngailut umtah houlam kai minin KBC Mission Office ahung vilhonin ahi.

1. Pastor Timothy Ro



ANSAN DONGSAN CHURCH South Korea houbung pastor pa ahi. Salom Theological Seminary staff hotoh ahungkhomun, Mission natoh gelkhoh na neiya eihung vilna chung uva kipa thu Mission Board minin isei uve. Mabana Mission natoh na a pan laikhom a taokhom jing ding

injong kinep na akinei jin ahi.

2. FMPB North India Promotional Secretary Cyrus Samuel le aloinu

Amani jong hiche nikho ma mahin Mission office vilna eihung neiun FMPB Missionary Rev Dk Sontak le aloinun ahin puihon na eihung viluhi kipa aumleeh jengin FMPB Mission organisation lenkhat ahina toh lhonin mabana Pathen natoh khomna ding semhoiding thu akisei



khom in KBC akon missionary ngaichat ahidan eihung seipeh un,

Convention adia lunggel phatah aneidan ahung sei jin achunga kipa thu akiseije.

KUM SUNGA MISSION NA KITONG HO VELVETNA

Achesa kum 2017 sung chun Mission natoh na lama pan ilah nao lunglhai anaum l'heh jenge. Alhangpia seidin gambih houbung hon jong pan ahin lahoi un 35 lakh budget kigon na a 34 lakh ina pedoh jounun ahi. Hiche hi 2016 kuma sanga chu nasa tah a hoijo ahitai. Chule Centre Church hoa kon Rs 79,53,000 mudinga budget ikigon naovah Rs. 86,79,000 ahin mujou un budget kalval in lakh 7 val ahin thah lut jou vun ahi. Hitabang a houbung jousen Mission natoh na a tomngaina ihin neijallun tohle tham kigong ho jong abon chan akitong doh soh in chujouvin jong budget balance jong ahung kinei thei kit in kipa aum l'heh jengin houbung jouse chung a kipa thu Mission Office lama konin ahung kisei jin ahi. kumthah 2018 sunga jong hi hoijo cheh leh tamjo cheh a pan hinla kit din Pakai minin temna jong ahung kinei kite.

MISSION 2018.

Tuni chana Pathen in KBC Mission natoh ahinpui hoija alengam adia pan lathei jaium jallun amintheng thang vah na ipeove.

Kum 2017 inalut tiluchun houbung mite jouse eima chang hinale houbung hinan Pathen koma kilhanna inaneicheh un kumsungin damna neipeo vinlang Nalenggam natoh na a neimang chan tin ina taoun ahi. Pathen in itaonao asangin kumche sa a boina tampi mihem hinan toh jong leo hen tuni chanin mitam tah chan joulou anatoh thei na neile gou, thale jung, hetna chihna inei hou mangchan pan ilathei unahileh vangpha ikisao vin Pakai Pathen ithang vahu ve. Chule taona jallin kumsunga Mission in toh doh dinga inagon hou inatong doh jou un kum ihung galkai taovin Pathen ithangvah uve.

Tukum 2018 ihung lut uto lhona Pathen a dia ipi boldia iki lhan uvem? Mission natoh kiti hi Pathen natoh tina ahi. Hiche hi Pathen in amisemsa mihem te ngailut jalla ahin pata tuni chana amanung jui ten atoh ban itoh jomnao natoh pipen chu ahi. Mission natoh kiti ahin eima chang phatchomna katdoh angaije (self-sacrifice). Ajeh chu Pathen amatah in jong achapa sacrifice ahin bolla Mission na atoh ahi, chule chapang jong amading gellou va mihem te ding

gelna a sacrifice kibola apan ahin sol lo na mission na ahung toh bulhit kit ahi. Hitabang kiphal theng nahi pang lou vin mihem khat in mission na atong thei poi. Mission natoh hi jat ni aume.

1. Eima tah kalson

Hiche eimatah kalson a Pathen natoh na ding a hin Pathen kouna ichan dan hatchet angaije. Pathen nin mijousehi kalsonga inle lou dalha a muntinna ahinna thupha seiphong dingin asol poi. Hita bang a thilbol Pathen ngol chu iPathen uhi ahipoi. Pathen in ama natong din eisol uve kiti hi itoh mun cheh uhi ama akon nganse na ichan nao mun ahi tina ah. Hijong leh hilaija kiseihi Pathen in mi konkhat hi ama natong ding mong mong in anatoh na akon akoudoh jin ahinna thupha lhangsama chonseten achonsetnao akihetdoh uva ahung kinung le kit diu deisah na Pathen tohgon kouna chang ho chu eima tah kalson tia kisei ahin hiche hi Pathen natoh na khat na ahi.

2. Michom khat sol

Hiche jonghi Pathen natoh ahithou ve. Ahin lah hiche hi Pathen in mihem khat chu abolthei sun anei agou achih na le athep na ahaonale aminthan na mangcha a atoh muna pansa a sumle pai senga mihem Pathen koulhen chang khat sponsore bol na ham tohle tham a neile nga a pan na ham ahilou leh ahetna achih na a Pathen natoh na a pan alah naho chu kisei na ahi. Hitabang natoh na ahin mihem Pathen tahsan jouse ajao thei soh e. Businessman, police personel, lawers politicians, social workers etc etc. Hitabang a michom khat solna hin iPathen natoh na a lung nachim mo nading aumpoi, ajeh chu Pathen lekhabuthenging akisol loule koi ham ache ding ati ahi. Mitam tah in hiche Pathen natoh hi Pathen natoh ahi ti hethem louvin amanop nop in Pathen in anganse na office a dandih loutah in athanei na amang chajin, business bolin dandih loutah in business abol jin, politician in dandihlou tahain politics ahin sai jin amopoh nachu Pathen in amalenggam natoh nading a apeh ahi ti aheththem ji lou jeh in a power chu amang khel jin ahileh Pathen loupi na akiphong doh jou ji tapoi. Tulai jin gambih tamtah in Gospel Olympic abol jin kichep golseh akon khangdong ho Pathen thua aman lut jin ahi. Hibang a chu imopoh nao natoh jouse hi Pathen lungdei natoh nading leh alengam ma dia kigot na mun hia ahi. Mitam tah in Pastor hole Evangelist ho missionary ho

chule houbung lamkaiho bou Pathen lhacha natong danin ageljin amanatoh namun chu Pathen akon ahilam ahethem ji pon hinkho theng loutah in amang jin ahi. Pastor khat in jule sa aneh a akham ding akilop lou bang bang a nang ma jong na office a jule sa naneh a nakham leh nakilop lou ahi ti sumil hih in ajeh chu hilai mun chu Pathen in nangma anatong dinga nanganse na mun ahi.

Hijeh chun muntina um Houbung mitheng te,tunin ibonchaovin Pathen koulhen chang kahi ti hi geldoh kit u hitin Alengam natoh ding leh akina kiman ding hi itoh pi penu hiding ahi ti sumil pou hite.

2018 kusm sunga dia KBC Mission tohgon lenpen thum inei hou.

1. Missionary Evangelist ho lhalo aphant cha pehjou ding.

Pathen a dia hang san taha hung kipe doh Missionary ho le Evangelist ho hi gilkel dang chah a koi louding ti hi mission office tup le doi pipen ahi.sumle pai houbung a kon hung lut ho jouse amaho kihinso thei nading leh lhasam louhella Pathen na atoh jou nadiu va alhalo diu va kipe/kithot masa pen ding ahi.Amaho lhalo pedoh masa louva Development natoh imacha kipan lou ding ahi.Hou lhacha natong ho,missionary ho chule Evangelist ho natoh hi eiho jouse khela kalsong ahiuvin amaho phatthei chanle lolhin ding chu eiho jouse lolhin na a kigel ahi.

2. Tripura Mission field thah honding

Hiche field hi kihong loulai hondinga imajouse kisutup ahitai.Aga-ma che ding Missionary pa hi 1st March a Office a report abol a hiche lhasunga hi kalsong ding ahitai. Hiche field hi eiho deijeh a kiche a field gakhong ahipon Pathen in eiho lutnadinga eina gon pehu CBCNEI mang cha a ilut nadiu toh gon hung kigong ahijon, field dang mun dang banga hiche gamhi gakive a kimachal kilolhing inte tia kihong go ahipoi. Tripura gama isopi hou koma tonsot kemlou hinna thupha langsap ding chu Pathen in eingan senao an-ahi ahi. Chule hiche gamahi Pathen in isopi hou inam miteo(Kukite) anachen sah ahin Pathen anahet lou jehun khonunga hung lungding thu anahethem tahi un Bangla Desh gama kon Muslim hon lungthim thim a anabol uva tunia agamsungu va paongam talou uachanding changjou talou va refugee banga hing tasa isopi hou laha hi Pathen thupha iga sei dinga ahi.Hiche chanvou hi vaigei

Iheh jong leh Pathen in eigonpeh u mopoh na ahi tia ilahuva tua Ihah Tripura gama imite hou dinga taona a ipan hu jing dinguh ahi-tai.

3. Elijah Taona Moul a Main Sanctuary sah ding

Elijah Taona Moul hi KBC in Taona Moul inei sun u chu ahi. Hiche taona moul hi Gothol haosa Pu Hillun Haokip in KBC Mission khut noiya Pathen natoh nadinga anapeh doh ahi. Aman kipah taha ahin peh to Ihonin lamkai masa hon amuna ngaicha prayer cabin, rest house, chaplin quarter, chapel hall chule adang dang angaicha cheng jo kham khamin anakoi khom un ahi. Aki ngaicha phapep chu aumtan ahin lah thil tampi ngaichat aum nalaije. Tu Mission Board in kitup le kidoi chu hiche Taona Moul hi Taona moul mai hilou va Retreat Centre khat a semdoh ding ti lung gel kinei ahi. A Moul hi Architecture Miss Christina Pamai Sight Plan akibol sah in KBC Assembly approval akila tan chuto Ihonin Main sanctuary khat 300-400 sitting capacity kum 2(2018-19) sunga sah doh teiding toh gon akinei tai.

Chunga kisei thil thum ho hi KBC Mission in kumsunga hin kiboi pi pending ahijeh in houbung mitheng te jong taona a nahung pan u va pehding kilom Mission share aphot cha ipeh cheh uva kum ni sung hi ijo tei nadiu va pan ihin lah cheh diuvin ikitem un, chule hiche Taona Inn kisah na a hi koitabang Pathen natoh na a gela pan lanom aumjong leh kot lentah a kihong ahi. Nget le tui eh in asuh mang thei na guchan jong aphetvang a aguh mang thei na muna gou kikhol sangin ngetle tuieh in asuh mang thei lou na guchan jong aphet vanga aguh mang thei louna van muna gou kikhol ding chu mihem khat dia gou kikhol tahbeh le hamphat na sangpen hiding ahi.

Hiche tohgon ho tohdoh a aumthei nadin houbung mite jousen KBC Mission chule board member ho jong taonan hin geldoh jing ute, ajeh chu project len ahin problem jong lending ahi ti hetsa ahi, Pathen pang louvin goljona aum poi. Natoh kigong ho jouse jo a aumthei nadin Pathen in KBC Mission natoh phatthei boh jing taken.

Rev. Henjalen Dounge
Mission Secretary
Kuki Baptist Convention (I)

HETSAH LE TEMNA

WORKSHOP ON CHURCH RESPONSE TO SOCIAL CONCERNS AND CREATION CARE

Lhukim ni : 15th Mrch 2018

Aphat sung : 16th - 18th March 2018

Amun(Venue) : Center Church Chavangphai,
Moreh No.15 Tengnoupal District, Manipur.

Resources Persons:

No.1. Green Thomas EFICOR

Topic : Church Response to Social Concern

No.2. Mang DOUNGEL EFICOR

Topic : Creation Care

No.3. Rev. Kaikam Chongloi

Topic : Envisioning Lom Resource Centre

Chunga kipe phat le nikho a hi tonlouva hungpang
dingin temna le hetsahna ahung kineije.

Note: Ahung pangding ho Gambih khat a Men Department Chairman le Secretary (Akhel hung thei)

Organized by : Lom Recource
Centre Men Department KBC &
in Partnership with EFICOR

(REV. KAIKAM CHONGLOI)
Secretary Men Department, KBC.

Women Column

Counselling Class

20 - 21 Saturday le Sunday nikho nini sunghin Lydia mun a Training bol New Batch ho le Boardinga um Student ho jouse Evan, Chingboi Chongloi, Child Evanelist KBC in Counselling Class aneipeh un tahsalam le lhagao lam'a adinmun u kisuhchet na aneitheijun kipa aume. Pathenin Evan, Chingboi le Lydia mun a umho jouse phat thei bohcheh tao hen.



KBC Gambih No. 12 Nute in Lydia mun hungvil

03/02/2018 Saturday nikho hin KBC Gambih No. 12 Nute mi 33 in Lydia mun a vil na ahuneijun, Women President nu Secretary nu Lamkainan amun a um lamkai hole chapang ho jouse toh Fellow-





ship kanei khomun, mipin taokhom akineijin, amahon jong kipana jallin Lydia a dingin Rs 3000/- ahinpeuvn, Pathenin Gambih No. 12 ho phat thei boh jing tao hen.

KBC C/C S. Kanan Veng Gambih No. 8 nuten Lydia Resource Centre hungvil

4th Feb, 2018 2018 Sunday nikho hin KBC C/C S. Kanan Veng Gambih No. 8 nuten Lydia vil na ahung neijun, taona le tilkhouna chuleh An-chang Bag 1, Bongnoi Kg 1, Chini Kg1 hichenghi ahinpouvin, ngailut na jallin eihung nao chung a Pathenin amichang chehchunga phat theina thalhingset in pejing tao hen.

Lhingjanem Haokip
Secretary, Women Dept,

KBC THUSO MAN THUA HETSAH

Muntin a KBC Thuso sim jouse ngailutna salaam KBC Office a kon in kahinpeove.

KBC Thuso ngailua simjing a aman hoitah a hinpejing ho-chung ah kipathu seijoulou ahung kiphong in, aban ah jong hinpe jomjing din ikitem uve. Record a aman pelou phabep akimujeh in ahithe leh ihin gelkhoh cheh diuvin ikitem kit uve, kumthum chan na hinpelou hohi akhoh dungjuja hungkipaikha ding ahijeh in ihin kigelkhoh chehdiuva hetsah na hungkinei ahi.

Youth Column

BIBLE QUEST 2018

Tukum Bible Quest jong hi eimi chenna gamkai jousea hung kibol kit ding ahitoh lhon in muntin a houbung mite jouse jong thanom tah a pan ilah diuvin kahin tem uvin ahi. Hiche hi youth te dingbou hilouvin koihileh Minu-Mipa, Nungah-Gollhang chuleh Chapang langjeng jong anomchan pangthei ahi. Hito lhon chun anojia hin tahlangna kahin neije.

Bible Mun : Jeremiah le Lamentations

Anikho : 14 October 2018, Sunday

Kitetna Mun : Eimi chenna munjouse

Prizes:

First – 15,000/- plus Memento

Second – 7000/- plus Memento

Third – 5000/- plus Memento

Consolation prizes: Mi 10 chan – Bible Leader Cover plus Memento

YOUTH DAY THUPI

Tukum Youth Day hi October 7, 2018 Sunday nikho ahitoh lhon in hiche thuah hin anojia hin hetdinga pha kahin tahlange.

Thupi: “Hat in lang Hangin” Deuteronomy 31: 6

Note: Tukum Youth Day La hi July sunga hung kithot doh thei ding ahitai.

YOUTH LEADERS MEET

Youth Leaders’ Meet hi tukum jong umding ahijeh in Gambih jousea Youth Lamkai hihen, Houbung tin’a Youth lamkai hijongleh thonlouhel’a ipan sohkei diuva hetsah kitna ahitoh lhon in anojia hin hetsahna phabep kahin neije.

Anikho: May 1, 2018

Amun: KBC Centre Church, New Lambulane

Apang ding: Gambih jousea Youth Work Committee, Gambih Local Houbung jousea Youth Work Committee, chule Centre Church jousea Youth Work Committee.

2017 CONVENTION LEVEL SUNDAY SCHOOL THEM VETNA

Kum phabep masanga pat tuni geiya ihinchepi jingu to lhonin 2017 kum a Senior 2 le pilhing class hoa Convention Level Sunday School themvetna anakibol Result dungjuin 65th Kuki Baptist Convention General Assembly, Centre Church, Kangpokpi munah themvetna a asangpen (First, Second, Third) ho kipaman (Prize) anoia kipe bangin anakihom doh tan ahi.

Pilhing

Sl. No.	Name of Candidate, Church	Gb. No.	Marks	Position	Award/Prize
1.	Lhingkhoneng Chongloi, Centre Church, Salem Saikul,	3	93	1	Rs. 5000 + Certificate
2.	Mercy Khongsai, Centre Church, Langol, Imphal,	1	92	2	Rs. 4000 + Certificate
3.	Hatneikim Kipgen, Keithelmanbi Solam Baptist Church,	5	91	3	Rs. 3000 + Certificate
4.	Tinkhohoi Haokip, Gothol Baptist Church,	8	91	3	Rs. 3000 + Certificate

Senior 2

Sl. No.	Name of Candidate Church	Gb. No.	Marks	Position	Award/Prize
1.	Hatboithem Doungei, Centre Church, Tujangvaichong,	6.	88	1	Rs. 3000 + Certificate
2.	Hoichinting Hangshing, Centre Church, Tujangvaichong,	6	87	2	Rs. 2500 + Certificate
3.	Lamkhohoi, S. Molcham Baptist Church,	8.	84	3	Rs. 2000 + Certificate

Convention Level a pachanna sang neiho chung a Pakai minin kipa thu sangtah ahung kiphonge. Prize sang ho jong pontho tah in pang jom jingu tin, asanglou ho jong lung lhalouvin sanna theidin kihabol cheh ute. Convention Level a pachanna sang neijou tahih jongle Gambih Level le Houbung Level a pachanna sang nei ho jouse chung a jong Pakai minin kipa thu sangtah ahung kiphongin, pontho tah a Convention Level Exam a pan laho jouse chung a jong

Pakai minin kipa thu sangtah ahung kiphonge. Ahin, Exam le Prize hi athupipen ahipon, ichennau gam chena dol a themvetna kibol a kitilkhouna dinga kipa man neocha cha kisem ahibouve. Athupipen chu mijousen Patghen thu hasim a isimuva, ihetuva Pathen thu lam a ikhantoupi thei diu joh chu athupipen ahi. Hiejeh chun, Convention Level a Prize san joulou jeh a lunglha a, "Tukal Convention Level Exam a jaukit taponge," ti gel louva pontho tah a pan ilah kit diuvin Pakai minin ikitemuve; ajeh chu themvetna a pan lah hi phachom thou thouvah ahi.

SUNDAY SCHOOL TEACHERS TRAINING - 2018 REPORT

2018 kum a dingin Sunday School Teachers Training chu Centre Church, Kangpokpi, KBC Gb. No 5 munah Traininga dinga hungkalsong KBC sunga houbung ho chungchonin KBA Nagaland te le Manipur a Hengbung Independent Baptist Church te le Kanglatongbi Children Home Baptist Church te panna in Sunday School Superintendent, Jilkungho le Resource Person (Sunday School Lesson hil le3 Seminar Class laho), Choreographer (Sunday School la le lam hil ho), Speaker ho le Department Committee Member ho pumin mi 500 val panna in thupitah le nomtah in anakibolin ahi. Training sunga Speaker ho, Resource person ho (Sunday School lesson hil ho, Seminar Class laho le lahil ho) le traininga hungpang houbung, houbung tin a Sunday School Superintendent ho le jilkung ho jouse chung a Pakai minin kipa thu sangtah ahung kiphonge. Chuleh Training sunga mipi neh le don, gena touna le adang danga nasatah a eiboipiu le eisa-sah uva pang Host Church (Centre Church, Kangpokpi) Pastor le atoh khompi houbung lamkai ho le houbung mi buhon mehon a pang le cha om a pang nupi upaho le, Usher a pang nungah gollhang ho jouse chung a jong Pakai minin kipa thu sangtah ahung kiphonge. Houbung mihon Sunday School ihin gelkhoh jep jep tah u to kilhon a Traininga jong pontho tah a ihung kalson uva mi akibe jing jeh in Pakai Pathen ithangvah uvin, houbung ho chung a jong kipa thu ahung kiseiye. Hitobanga hi gelkhohna neitah le pontho tah a Sunday School phatah a inaboluva inachepe jing diuvin Pakai minin ikitemuve.

2018 KUM A CONVENTION LEVEL TEMVETNA (EXAM) BOLDING DAN

2018 kum a Senior 2 ho le pilhing class ho Convention Level Exam bolding dan 65th KBC General Assembly a kiphat sahna to lhonin anoiya kipe banghin ahung kikhel jep tan ahi.

(i) Ahoubung, ahoubunga Question akisemuva Exam aboldiu, asangpen 3 (top three) ho chu gambih Level Exam a asol diu.

(ii) Agambih agambih a gambih Pastor le Gambih lamkai ho mopohna a question asemuva

gambih Exam Centre agon nau mun a chu gambih lamkai Conduct bolna noiya gambih

Level Competetive Exam ahinbol diu

(iii) Gambih Level Competetive Exam a asangpen mi 5 (top five) alhendoh diu

(iv) Agambih agambih a asangpen mi 5 (top five) kilhengdoh ho chu Convention Level

Competetive Exam a pang diu

(v) Convention Level Competetive Exam hi Literature & Publcaton Committee in Imphal

khopi sunga akilemna mun khat a Exam Centre agonuva, hiche mun a chu Convention

Level Competetive Exam Conduct aboldiu.

(vi) Convention Level Competetive Exam Question Literature & Publication Department

Secretary mopohna a Office langa kon a kisem ding.

N.B: Convention Level Exam hi 2018 KBC Events Calendar a kipe 25th November (Sunday), 2018 nikho hi hiding, hiche masanga hi houbunga le gambih a boldoh teiding, gambih a kon a top five (asang pen mi 5) hung kilheng doh chu 25th November, 2018 nia Convention Level a kitetna (Exam) a hungpang diu ahi.

Literature & Publication Committee

Education Column

HETSAH

2017-18 – Theological Students Scholarship(FinalYears Students) apply anabolho, 65th KBC Assembly C/C Kangpokpi in eiphatsah-peh hou cheng, ahung lhung ding March 22(Thursday) ni 11:00 am leh KBC Office, Chapel hall a thakhat tah'a hopdohpehna kin mandingin Board in phatsahna akineiijin, asang dinghon mi khat ahin kilhonpithei, ama tah a apantheilou ding leh a Insung mi khat akhel'a ahinsoltheidiu, Christian Edn Board Secy.pu (Rev Onthang Haokip, Ph.no. 7005268953/9862829818) ahin hetsah masah-uva, ahung lah pehdiuvin hetsah ahi. Koitobang phat kitep nikho a hungpang lou aumkhah leh avel'a Prog. kigonpeh thei talou ding ahi tia hetsah thuphon hi kahin peh u ahi.

Kaki pah e.

Program highlight 22nd March, 2018(Thursay -11:30 am),

- ✦ Lamkai - Pu Jangmang Haokip, B/member
- ✦ Thangvahna tao - Upa L.Yampu Baite, - do -
- ✦ Lemna thusei - Dr L.Haokholet, Chairman, Edn Bd
- ✦ Scho. Thu a hilchetna le
Hop dohna - Rev Onthang Haokip, Secy Edn Bd
- ✦ Tilkhoua le vang thumpehna - Rev Dr M Thongkhosei Haokip, Gen. Secy. KBC
- ✦ Tilkhoua/kipa thuseina - Anom chan
- ✦ Kilhadohna le Refreshment
a dinga taona - Rev. Letpu Kipgen, Secy. Finance. KBC

*Rev Onthang Haokip
Secy. Christian Education Board (KBC)*

Assembly Report

Houbung mitheng te jouse Jesu Christa min in kangailut nao sa-laam kahin pei. Pathen in itaonao asang in 65th General Assembly Centre Church Kangpokpi mun'a lolhing tah in chaijin aum thei jin Pathen thangvah na peo hite. Tuchung Assembly a gah hetttheiho-chu

1. Rev. Dr. Hawlingam Haokip President in Assembly pat ahi phondoh nan 25th January nin KBC ponlap ana khaidoh e.

Assembly Delegate mi 400 ahung kikhom e.

Convention General Secretary term ahung lhin to kilhon in kum 2018 to 2021 chan kivaihomna kong tol din Rev. Dr. Thongkhosei Haokip lhendoh ahitai.

KBC natoh na a kon kicholdo din Rev. D. Doungel leh Rev. Amar Rai lhah-doh na akimang e.

Vangset umtah in Rev. N. haokip General Secretary akeng ana kisuhkhah jeh in Assembly a anapangjou tapon hijong le ama khel in Pastor Haoneo Haokip in General Secretary incharge ala in Assembly lolhing tah in ana kichai je.

Aban 66th General Assembly hi Centre Church New Lambulane a umdin kiphatsah na ahitai.

28th Jan. nilhah in KBC ponlap pu lhunthang Kipgen Vaice President in khailhahna aneijin Assembly khumkhana akineitai.

Assembly delegates ho ahin mun tin houbung tin'a taona hung pang ho jouse chungin kipas thu sei jou lou akiphonge. Adeh in C/C Kangpokpi houbung miten pon tho tah a assembly lolhin na dia tha le jung pan'a pan alah u aki mun, achung uva kipa thu akiphonge. Maban'a jong Convention ngailut najall'a ngailut nanei tah a pan la jing dingin houbung mite tiem ihiuve.

General Secretary Thah Kilheng Doh Ta

Kivai hom nadung juija General Secretary kikhel phat ahi to dungjui jin KBC 65th General Assembly C/Church Kangpokpi houbung mun'a General Secretary kilhen najong aum in assembly in lung kitoh tah in Rev. Dr. M. Thongkhosei Haokip, hi



KBC General Secretary dingin lhen doh ahi tai. Muntin'a um houbung mite jousen General Secretary Pathen phatthei boh achan a tahsa lam hihen lhagao lam hijong le khan tou nale machal na Convention sunga ahin poh lut thei nadin taonan sumil pou hite.

KBC General Assembly kichai tajongle toh ding le tham ding tampi iki gon hou

kitong pan lou lai ahijeh in natoh ding kigong ho toh doh a aum thi nading hin houbung mite jousen pan mun lentah inei uve ti sumil louva KBC ngailut najalla pan lajing dingin iki tiem uve. Kumkit Assembly dam'a imu kit kah seu vin Pathen in houbung mite jouse eiching jing tao hen!

BYD Diamond Jubilee Lolhing that a kimang



Feb. 6, 2018 Tuesday nikhon KBC CC Church Tujangvai-chong, BYD Diamond Jubilee Lolhing tah in anakimang in ahi. Hiche kina eipan peh u Kinthempu, speaker leh artiste; chule ahung kikhom Rev.Pastor ho, Gambih Lamkai ho leh houlamkai hojouse chuleHoubung mitejouse chungu kipana sangtah akineijin ahi. Pathen in Phatthei boh cheh tauhen.

Pastor Jangthang Kipgen, Church Pastor.

CHINA FIELD MUN'A KON

HOUBUG LEKHATHOT

August - November, 2017

Amasan houbung mite leh eitaopeh ho heng'a avel ah toh-phon (Newsletter) lekhathot hinjih theiya damna eipe'ah Pa Pathen thangvahna kahinpe in ahi.

Neihin taopeh jing jeh un Pathen jal in Kei leh Ruby jong ima lam jousen ka machal jing lhon in ahi. Eihin taopeh houbung mite hetding in kaki manchah dan lhon leh natao-nau gaa phabep hin tahlang inge.

1. Discipleship Mr. John hi 2016 kum ah Pathen heng'a kana puilut pa chu ahi. Tuhin amatoh hapta khat sung (Sunday or Saturday) n in khatvei Pathen thu simkhom na kanei peh jing lhon in ahi.

Hiche phat kaman khom teng uleh tahsa leh lhagao lam in jong tilkhouna kanei lhon in, ann kong umkhom naleh taokhomna jong kanei jing un ahi.

2. Family Corner (FC)

FC hi English Corner ah hungpang university students hotoh kihet gilna kanei khom teng uleh achombekh ah Pathen thu kasei peh uh, kasim khompiu chuleh inn houbung ah jong invite kabolji uvin ahi.

3. Hand in Hand Play Center (HHPC)

HHPC hi Pathen in ama lenggam natoh nading ah achesa Sept lha chun kaloiho akonin kot eina honpeh lhon in ahi. Hapta khat sungin nili (Four days) ka kalsongji lhonin, hiche mun ah Pathen tahsan leh tahsanlou chapangho Pathen thu toh kitoh ah themjilna kipeji lhon in ahi.

4. Mandarin Pao Chinese pao hi pao hahtah hijong leh houbung mite taopeh najal leh keima kiham bol toh lhon in Pathen lungset jal in ka machal jingin ahi. Huayang Academy akonin 1st quarter leh 2nd quarter exam kana bol un Pathen lungset jalin A+ above kana mu in, Principal nu injong nasatah in eina pahcha in ahi.

5. Tahsan Twilut Thah Muntin ah tahsan chate in China mite adia taona kinei hi Pathen in, don louvin akoipon ahi. Pathen lhagao in inn houbung ho akonin naa atong jingin, aniseh ah Pathen kisan hi akihe joujai poi. Houbung mite taona vangin keiho Inn - houbung leh local Inn - houbung kikhutjopna jal'n, achesa 26th November Sunday nikho chun mi thum (3) tahsan twilut kana chan kit un ahi.

Hingjing Pathen chu thangvah leh vahchoi in umjing taken!

Pakai lenggam ah natoh khompiu

Mr. & Mrs. S. Letminthang Haokip, KBC, M. Co-Ordinator, SEA

CHATE CAMP LOLHING TAH A CHELHA



Achesa January 22-25, 2018 sung in Evan. Helun Chongloi Evan. Thangneo Vaiphei Camp Speaker, chuleh Evan. Let-jangam Haokip Camp Direction pan lahnna KBC C/C Tujangvaichong a chate 90 vel jaonan camp ana kibol e.

Pastor Jangkhothang Kipgen
Church Pastor.



**Rev. D. Doungel leh
Rev. Amar Rai**
Pension che kilhahdoh ta



**1st February 2018 nikho a
Head Office mun a
kikhutkhel na**



Post Regd. MNP/81
Regd No. 18134/88



If undelivered, please return to

The Editor, KBC Thuso

KUKI BAPTIST CONVENTION

Opp. DM College, Imphal - 795 001

Contact: 9862633173